

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 220691 22 St
Zenica, 13.3.2024. godine

Općinski sud u Zenici, stečajna sudija Samra Spahić-Drino, odlučujući o prijedlogu za provođenje stečajnog postupka nad stečajnim dužnikom „BARIŠIĆ“ d.o.o. Rosulje-Tešanj, Društvo za trgovinu, održavanje i popravak motornih vozila, sa sjedištem na adresi Rosulje bb, Tešanj, kojeg zastupa punomoćnica Bošnjak Berina, advokat iz Tešnja, dana 13.3.2024. godine donio je:

RJEŠENJE

Pozivaju se povjerioci i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam u iznosu od 5.000,00 KM za obezbjeđenje troškova stečajnog postupka, na depozitni račun ovog suda broj: 134-010-0000044837 otvoren kod ASA Banke d.d. Sarajevo, Poslovna jedinica Zenica, te da po izvršenoj uplati predujma sudu dostave uplatnicu, kao dokaz da je uplata izvršena.

Ukoliko povjerioci i zainteresovana lica u navedenom roku ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak nad imovinom stečajnog dužnika „BARIŠIĆ“ d.o.o. Rosulje-Tešanj, Društvo za trgovinu, održavanje i popravak motornih vozila, sa sjedištem na adresi Rosulje bb, Tešanj, matični registarski broj subjekta upisa 1-9140, te po pravomoćnosti rješenja o zaključenju stečajnog postupka narediti brisanje ovog društva iz sudskog registra.

Obrazloženje

Predlagač „BARIŠIĆ“ d.o.o. Rosulje-Tešanj, Društvo za trgovinu, održavanje i popravak motornih vozila podnio je ovom sudu 31.10.2022. godine prijedlog za otvaranje stečajnog postupka zbog platežne nesposobnosti stečajnog dužnika.

Rješenjem ovog suda od 30.3.2023. godine pokrenut je prethodni postupak radi utvrđivanja uvjeta za otvaranje stečajnog postupka nad navedenim društvom, te je za privremenog stečajnog upravnika imenovan Alić Izudin iz Tešnja, koji je na listi stečajnih upravnika.

Iz izvještaja privremenog stečajnog upravnika, koji je dostavljen sudu 9.5.2023. godine, proizilazi da je stečajni upravnik utvrdio da društvo duži niz godina ne obavlja poslovnu ili drugu djelatnost, ne ostvaruje prihode, ne posjeduje vozila, opremu i alat za obavljanje poslovnih aktivnosti, nema mogućnost da izmiri obaveze te su ispunjeni uslovi za otvaranje stečajnog postupka. Istakao je da društvo nema imovine iz koje bi se formirala stečajna masa za podmirenje troškova stečajnog postupka, a za potvrdu MUP-a Ze-do kantona, Odsjek za administraciju Tešanj istakao je da je društvo 2010. godine iz promidžbenih razloga kupilo Traktor marke FIAT tip 215 TD koje je bilo staro 44. godine. Kako društvo ne obavlja poslovnu saradnju i nema imovine, te postoje dospjele obaveze, ispunjeni su uslovi za otvaranje stečaja i predložio je da se pozovu povjerioci i zainteresovana lica sa predujme iznos od 5.000,00 KM na ime troškova postupka. U izvještaju je naveo da organ ovlašten za zastupanje stečajnog dužnika nije podnio prijedloga za otvaranje stečajnog postupka u roku od 60 dana od dana nastupanja platežne nesposobnosti.

Podneskom od 22.5.2023. godine Porezna uprava FBiH, Kantonalni porezni ured Zenica, podnio je prijedloga za donošenje mjera obezbjeđenja- zabrane otuđenja i oprerećenja traktora FIAT 215 DT.

Podneskom od 6.6.2023. godine privremeni stečajni upravnik dostavio je odgovor na prijedlog Porezna uprava FBiH, Kantonalni porezni ured Zenica u kojem je naveo da u zvaničnoj poslovnoj dokumentaciji, bilansu stanja, nema evidentirane imovine traktor FIAT 215 DT, te je od odgovorne osobe tražio obrazloženje i saznao je da je vozilo nabavljeno 2010. godine za promidžbene svrhe, staro 44. godine, a nekoliko godina kasnije je nakon izvršene ispravke vrijednosti i amortizacije isknjiženo iz poslovnih knjiga i rashodovano, te je veći dio sredstava završio kao staro željezo. Istakao je da je odgovorna osoba načinila propust jer nije po rashodovanju vozila izvršila vraćanje tablica. Naveo je da nema osnova za donošenje mjere obezbjeđenja odnosno zabrane otuđenja i opterećenja.

Na ročištu koje je održano 10.11.2023. godine privremeni stečajni upravnik je ostao kod izvještaja, te je izjavio da je društvo prestalo obavljati poslovne aktivnosti prije 8 godina, da je polovinom 2021 godine bio pokrenut stečajni postupak, ali je kasnije zbog nedostavljanja tražene dokumentacije rješenjem suda odbačen, da je transakcijski račun društva blokiran u kontinuitetu od 29.12.2014. godine, da tokom 2022. godine i 2021. godine društvo nije obavljalo poslovne aktivnosti ni ostvarivalo poslovne prihode, da su ukupni poslovni rashodi za 2021. godinu iznosili 271.931,00 KM koji su posljedica sređivanja i ažuriranja poslovnih knjiga, da prema bilansu na dan 31.07. te na dan 31.12.2022. godine društvo nema prikazanih stavki bilo kakve imovine odnosno nekretnina i pokretnih stvari, a u izvještaju je navedeno da se na potvrdi MUP-a nalazi vozilo odnosno preciznije traktor tip FIAT-215DT godina proizvodnje 1966. koje je rashodovano najmanje desetak godina prije podnošenja prijedloga za otvaranje stečajnog postupka, ali se isto nalazi u evidenciji MUP-a jer tablice nisu vraćene, a na podnesak Kantonalnog poreznog ureda Zenica od 22.05.2023. godine izjasnio se 05.06.2023. godine da nema predmetne stvari i da nema osnova za donošenje mjera obezbjeđenja. Izjavio je da ne postoje nikakve mogućnosti da se društvo bavibilo kakvim poslovnim aktivnostima u toku prethodnog postupka. Predložio je da sud objavi poziv i pozove potencijalno zainteresovane povjerioce da predujme iznos od 5.000,00 KM na ime nastavka postupka, a ukoliko u ostavljenom roku niko ne predujmi navedeni iznos predlaže da sud donese rješenje o otvaranju i zaključuju stečajnog postupka nad ovim društvom. Na istom ročištu, pošto prema izvještaju privremenog stečajnog upravnika stečajni dužnik nema imovine, a prema raspoloživoj dokumentaciji koje je sudu dostavljena proizilazi da stečajni dužnik ipak ima imovinu koja se sastoji od motornog vozila Traktor marke FIAT, tip motornog vozila 315 DT registarska oznaka E46 E 323, sud je odredio vještačenje po vještaku mašinske struke, koji će utvrditi vrijednost navedenog motornog vozila. Za vještaka je određen Ajanović dr. sci. Mesud iz Tešnja.

JP CESTE FEDERACIJE BiH d.o.o. Sarajevo su podneskom od 13.11.2023. godine dostavile prijavu potraživanja, koja je proslijeđena privremenom stečajnom upravniku, uz navode da je dostavljena prijava iako nije otvoren stečajni postupak te da se dostavlja na znanje radi izmjene ili dopune izvještaja.

Stalni sudski vještak mašinske struke Ajanović Mesud dostavio je nalaz i mišljenje od 25.2.2024. godine. U istom je naveo da je stupio u kontakt sa privremenim stečajnim upravnikom koji mu je rekao da je traktor po njegovim saznanjima rashodovan i prodat u staro željezo, a što je potvrdio i Barišić Danijal, vlasnik preduzeća, kojeg je kontaktirao. Dalje je naveo da kako nije bio u mogućnosti na licu mjesta pregledati predmetni traktor nije u mogućnosti izvršiti realnu procjenu istog, ali ako su tačni prethodni navodi može dati procjenu vrijednosti predmetnog traktora kao vrijednosti otpadnog željeza, te ista vrijednost iznosi 517,50 KM.

Na nastavak ročišta zakazan za 13.3.2024. godine pristupili su privremeni stečajni upravnik, punomoćnica predlagača i punomoćnica Porezna uprava FBiH, Kantonalni porezni ured Zenica, dok za JP CESTE FEDERACIJE BiH d.o.o. Sarajevo niko nije pristupio, iako je dostava poziva bila uredna. Privremeni stečajni upravnik je izjavio da je nakon prijema nalaza vještaka kopiju dostavio Kantonalnom poreznom uredu u Zenici sa zahtjevom da mu dostave instrukciju za plaćanje navedenog iznosa odnosno da se izjasne na koji račun javnih prihoda, na što mu je u kratkom roku odgovoreno i dostavljena instrukcija o čemu je upoznat osnivač, koji je odgovorna osoba, i jučer je izvršena uplata navedenog i procijenjenog iznosa od 517,50 KM po instrukciji Kantonalnom poreznom uredu u Zenici na račun Federalnog ministarstva finansija kao doprinos za penziono invalidsko osiguranje.

Sud je odlučio kao u izreci iz sljedećih razloga.

Kako stečajni dužnik ima obaveze, a nema imovine, pa ni za pokriće troškove stečajnog postupka, odnosno kada bi se pretpostavilo i da ima imovinu traktor FIAT procijenjen kao staro željezo za iznos od 517,50 KM, s obzirom na godište istog i amortizaciju, kao i navode privremenog stečajnog upravnika o visini naknade za rad koja je u visini prosječne mjesečne plate, dužinu trajanja stečajnog postupka, troškove koji bi nastali, to je sud primjenom odredbe člana 102. stav 7. i 8. Zakona o stečaju („Službene novine F BiH“, broj: 53/21), pozvao povjerioci i zainteresovana lica da predlože otvaranje stečajnog postupka i predjme dovoljan novčani iznos za pokrivanje troškova stečajnog postupka (otvaranje i provođenje stečajnog postupka), ukoliko su zainteresovani za vođenje stečajnog postupka. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupka, imajući u vidu da prema izvještaju privremenog stečajnog upravnika stečajni dužnik nema imovine za pokriće troškova stečajnog postupka, kao i prethodno navedene razloge.

S obzirom na izloženo odlučeno je kao u izreci ovog rješenja primjenom odredbe članu 102. stav 7. i 8. Zakona o stečaju, a ovim rješenjem povjerioci i zainteresovana lica su upozoreni na posljedice propuštanja postupanja po pozivu ovog suda.

PRAVNA POUKA:
Protiv ovog rješenja nije
dozvoljena žalba.

Stečajni sudija:
Samra Spahić-Drino